

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**Z A K O N
O DOPUNI ZAKONA O LIKVIDACIONOM POSTUPKU**

Sarajevo, septembar 2013. godine

Z A K O N
O DOPUNI ZAKONA O LIKVIDACIONOM POSTUPKU

Član 1.

U Zakonu o likvidacionom postupku („Službene novine Federacije BiH“ broj: 29/03), iza člana 16. dodaje se novi član 16a. koji glasi:

„Član 16a.

Primjena Zakona o stečajnom postupku

(1) Odredbe Zakona o stečajnom postupku primjenjivat će se i u likvidacionom postupku, ukoliko ovim zakonom nije drugačije određeno.

(2) U likvidacionom postupku neće se primjenjivati odredbe Zakona o stečajnom postupku kojima se uređuje reorganizacija dužnika, skupština i odbor povjerenika, različni povjerenici, pobijanje pravnih radnji i ročište za glavnu diobu.“.

Član 2.

Ovaj zakon stupa na snagu osmog dana od dana objavljivanja u "Službenim novinama Federacije BiH".

O B R A Z L O Ž E N J E

Z A K O N A O D O P U N I Z A K O N A O L I K V I D A C I O N O M P O S T U P K U

I – U S T A V N I O S N O V

Ustavni osnov za donošenje ovog zakona sadržan je u odredbi člana IV. C. 3. a u vezi sa članom IV. A. 20. (1) d), Ustava Federacije Bosne i Hercegovine, kojim je propisano da pravila postupka potrebna da bi se osigurala jednakost u postupanju kao i osnovni principi pravičnosti u postupcima pred sudovima i organizaciji svih sudova, bit će utvrđeni zakonima Federacije. Obzirom da se ovim zakonom uređuju pravila likvidacionog postupka pred sudovima u Federaciji BiH navedena ustavna odredba predstavlja ustavni osnov za njegovo donošenje, pa je na osnovu člana IV. A. 20. (1) d) Ustava Federacije BiH, Parlament Federacije BiH nadležan za donošenje ovog zakona.

II – R A Z L O Ž I Z A D O N O Š E N J E Z A K O N A

Analizirajući postojeće zakonsko rješenje u oblasti provođenja likvidacionog postupka nad pravnim licima, te uzevši u obzir sve činjenice koje ukazuju na određene nedorečenosti u postojećim zakonskim odredbama, pristupilo se izradi Zakona o dopuni zakona o likvidacionom postupku. Kako bi došli do kvalitetnijeg zakonskog rješenja uzete su u obzir preporuke proizašle iz konkretnih slučajeva u sudskoj praksi, a posebno one koje su se odnosile na postojeće praznine u važećem zakonskom tekstu. Dopunom postojećih normi želi se zaokružiti sistem procesnih normi koje se primjenjuju prilikom provođenja likvidacionog postupka i otkloniti svaka dilema oko primjene drugih procesnih zakona u ovom postupku.

Također, veoma je bitno istaći da potreba za postizanjem konciznog, sadržajnog i nadasve praktičnog zakonskog rješenja u ovoj oblasti predstavlja korak ka ispunjenju ciljeva u otklanjanju pravnih i drugih prepreka za investiciona ulaganja u Federaciji Bosne i Hercegovine iz zajedničke izjave koju su, dana 07.10.2011. godine u Sarajevu, potpisali Premijer Federacije Bosne i Hercegovine i član Upravnog odbora Vijeća stranih investitora u Bosni i Hercegovini. Naime, potpisivanjem zajedničke izjave prihvaćena je obaveza konkretnijeg razmatranja 67 preporuka Vijeća stranih investitora u Bosni i Hercegovini, sadržanih u dokumentu pod nazivom „Bijela knjiga“, kojim se vlastima sugeriraju prioritete reforme radi otklanjanja ključnih prepreka za investiciona ulaganja u Federaciji BiH, a koja bi u Federaciju BiH donijela znatna novčana sredstva kao i nova radna mjesta. Kako se niz primjedbi i sugestija sadržanih u navedenim preporukama Vijeća stranih investitora direktno ili indirektno reflektira i na Zakon o likvidacionom postupku ukazala se potreba za donošenjem Zakona o dopuni.

III - OBRAZLOŽENJE PREDLOŽENIH ZAKONSKIH RJEŠENJA

Članom 1. Prijedloga zakona o dopuni Zakona o likvidacionom postupku vrši se dopuna u postojećem zakonskom tekstu i uvodi se jasna odredba koja propisuje da će se Zakon o stečajnom postupku, primjenjivati i prilikom provođenja likvidacionog postupka, ukoliko naravno nešto nije riješeno Zakonom o likvidacionom postupku i ukoliko nije sa istim u suprotnosti. U stavu dva preciznije se određuje koje odredbe Zakona o stečajnom postupku se neće primjenjivati. Ovakvom dopunom postojećeg zakona želi se zaokružiti procesni sistem koji se odvija pred sudom prilikom provođenja likvidacionog postupka i na precizan način formulirati sve faze kroz koje prolazi likvidacioni postupak. Naime, zbog bliskosti materije kojom se bave oba ova zakona najlogičnija je uputa na primjenu Zakona o stečajnom postupku, naravno u onom dijelu koji po prirodi stvari odgovara likvidacionom postupku. Činjenica je također da Zakon o stečajnom postupku sadrži upućujuću normu koja ukazuje na primjenu Zakona o parničnom postupku, te bi se time ovaj procesni sistem zaokružio. Također valja uzeti u obzir da važeći tekst zakona o likvidacionom postupku nije obiman, te procesno nije obuhvatio mnoga pitanja. Nadalje, već je propisano da se likvidacioni postupak vodi pred sudom koji je nadležan za provođenje stečajnog postupka, dakle intencija zakonodavca je i prvobitno bila usmjerena na upućivanje prema Zakonu o stečajnom postupku. Naravno, određene zakonske norme nisu primjenjive na likvidacioni postupak obzirom na njegovu prirodu i predmet određenih normi iz Zakona o stečajnom postupku, pa se u stavu dva predloženih dopuna, takstativno navode odredbe koje se ni u kojem slučaju ne mogu primjenjivati.

IV - PRIMJEDBE I PRIJEDLOZI POSLANIKA I DELEGATA U PARLAMENTU FEDERACIJE BIH ISKAZANI NA NACRT ZAKONA

Nacrt Zakona o dopuni Zakona o likvidacionom postupku razmatran je na nastavku 17. sjednice Predstavničkog doma Parlamenta Federacije BiH, dana 29.11.2012. godine. Zaključkom donesenim na navedenoj sjednici, utvrđeno je da Nacrt zakona može poslužiti kao osnova za izradu Prijedloga zakona. Jedina primjedba, poslanika i člana Zakonodavno-pravne komisije Predstavničkog doma Parlamenta Federacije BiH, Nasira Beganovića, odnosila se na to da iz teksta u članu 16a. stav 1. treba brisati broj Službenih novina Federacije BiH zbog kasnijih izmjena koje ne bi bile obuhvaćene, je prihvaćena i taj dio teksta je brisan. Drugih primjedbi, sugestija i prijedloga nije bilo. Dom naroda Parlamenta Federacije BiH, razmatrao je predmetni tekst u formi nacrtu na nastavku 13. sjednice, koja je održana dana 20.12.2013. godine i donio Zaključak kojim prihvata Nacrt zakona o dopuni Zakona o likvidacionom

postupku i smatra da isti može poslužiti kao osnov za izradu Prijedloga zakona. Dodatnih sugestija i primjedbi nije bilo.

V- FINANSIJSKA SREDSTVA

Za provođenje ovog zakona nije potrebno osigurati dodatna sredstva u Budžetu Federacije Bosne i Hercegovine.